

Inersimasunut paaqqinniffiit immikkut siunertallit pillugit Inatsisartut peqqussutaat nr. 6, 28. april 1988-imeersoq

Suliassaqartitsinermik inunnillu isumaginninnermik Kalaallit Nunaanni inatsit nr. 580 29. november 1978-imeersoq, takuuk Nalunaarut nr. 417 27. september 1979-imeersoq, tunngavigalugit makku aalajangersarneqarput:

Kapitali 1.

Siunertaa.

§ 1. Isumaginninnermi Naalackersuisup isumagissavaa paaqqinniffinni immikkut inersimasunut siunertalinnut inissat pisariaqartinneqartut pigineqarnissaat, Inatsisartut peqqussutaasigut allatigut taamaaliornissaq periarfissinneqarsimannikkaangat.

Kapitali 2.

Pilersitsineq ingerlatsinerlu.

§ 2. Inatsisartut peqqussutaat manna malillugu nuna tamakkerlugu paaqqinniffiit Isumaginninnermi Naalackersuisoqarfimmit pilersinneqarsinnaaflutillu ingerlanneqarsinnaapput Isumaginninnermi Pisortaqarfik aqqutigalugu.

Imm. 2. Inatsisartut peqqussutaat manna malillugu kommunini ataasiakkaani paaqqinniffiit kommuninit pilersinneqarsinnaaflutillu ingerlanneqarsinnaapput, ilaatigut kommunit arlariit ikioqatigiinnerisigut.

§ 3. Inatsisartut peqqussutaat manna malillugu paaqqinniffiit imminut pigisut pilersinneqarsinnaapput, Isumaginninnermi Naalackersuisoq kommunalbestyrelsiluunniit attavigineqartoq ingerlatsinissamut isumaqatigiissuteqarfigisimagaanni.

§ 4. Isumaginninnermi Naalackersuisup pisariaqartitsineq naapertorlugu paaqqinniffiup pilersinneqarnissaanut, atorneqarnissaanut, aqqissuunneqarnissaanut, aqunneqarneranut ingerlanneqarneranullu malittarisassat aalajangersartassavai, matumani ilanngullugit akiliuteqartarnissamut aalajangersakkat kiisalu paaqqinniffimmi perorsaanikkut malittarisassat.

Imm. 2. Taamaaliornissaq naleqquttuutinneqarpat inuusuttut 18-it inorlugit ukiullit Inatsisartut peqqussutaat manna malillugu paaqqinniffinni taamaattuni inissinneqarsinnaapput.

Imm. 3. Isumaginninnermi Naalackersuisoq Isumaginninnermi Pisortaqarfik aqqutigalugu perorsaanikkut siunnersuisuullunilu paaqqinniffinnik nakkutilliisuusaaq.

§ 5. Isumaginninnermi Naalackersuisup piffissami misiliiffiugallartumi suliniutit peqqussummi matumani taaneqarsimannikkaluartut pilersinneqarnissaat akuersissutigisinnaavaa.

Kapitali 3.

Aningaasalersuineq.

§ 6. Nuna tamakkerlugu paaqqinniffiit pilersinneqarnissaannut aningaasartuutit tamakkiisut ilaannakortulluunniit landskarsimit akilerneqarsinnaapput.

Imm. 2. Isumaginninnermi Naalakkersuisup aalajangersagai erseqqinnerusut ntalillugit paaqqinniffiit nuna tamakkerlugu paaqqinniffiunngikkaluartut landskarsimut tapiiffigineqarsinnaapput, takuuk § 4, imm. 1.

Imm. 3. Nuna tamakkerlugu paaqqinniffiit ingerlanneqarnerannut aningaasartuutit paaqqinniffiit atornerarnerat pillugu qanoq annertutigisumik akiliisarnissaannut aalajangersakkat malillugit kommuninit akilerneqartassapput, takuut § 4, imm.1.

Kapitali 4.

Atuutilerfia.

§ 7. Inatsisartut peqqussutaat manna atuutilerpoq 1. maj aallarnerfigalugu. Tamatumunnga peqatigitillugu landsrådit kommunini ungdomspensionit pillugit ileqqoreqqusaat 18. november 1977-imeersoq atorunnaarsinneqarpoq.

Namminersornerullutik Oqartussat, ulloq 28. april 1988

Jonathan Motzfeldt

/

Aqqaluk Lynge